

**Zeitschrift:** Annalas da la Societad Retorumantscha  
**Herausgeber:** Societad Retorumantscha  
**Band:** 45 (1931)

**Artikel:** Ord la historia e cultura de Schlans  
**Autor:** Pfister, Giachen Antoni  
**DOI:** <https://doi.org/10.5169/seals-201847>

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 15.04.2026

**ETH-Bibliothek Zürich, E-Periodica, <https://www.e-periodica.ch>**

# Ord la historia e cultura de Schlans

da

GIACHEN ANTONI PFISTER A NEUHAUSEN.

Nus havein observau, che l'enconuschientscha dell' historia locala svanescha adina pli e pli. Per honor e carezia enviers ils babuns e per mantener quella en la generaziun giufna, havein nus rimnau e mess quellas notizias, ch' ein buca complettas, en scret. Nus havein la speranza, che quella lavur stimuleschi auters de complettar ella ne de scriver enzatgei semegliant sur auters loghens. Malgrad las ovras monumentalas eis ei ozildi aunc pusseivel de prestar lavur productiva en la historia locala.

\* \* \*

## I. La situaziun.

Il pign vitg de Schlans ei situaus sin la sulegliva spunda seniastra dil Rein anteriur en l'altezia de 1177 m sur mar. En il proxim contuorn dil vitg neschan varga in tozzel fontaunas, tuttas cun ina bun' aua frestga, che ha quasi gl'entir onn la medema temperatura. Sisum il vitg sgarguglia ordamiez in grep ina gronda fontauna. Tras construcziun d'in acquaduct 1892 survecha ella a tut la vischnaunca. Scadincass ein quellas bunas auas stadas il motiv de secolocar en quei greppus liug. Greppa ed uauls protegian il vitg sin treis varts da vents e lavinas.

Cun sias grondas casas dublas de lenn, cun preits barschadas e slavazadas, cun termentas lautgas, giud las qualas bials matgs de neglas paradeschan, ei Schlans il ver tip d'in vitg sursilvan. Igl emprem quader dellas preits, che schaian sin la miraglia dil tschaler, ei ornaus cun inscripziuns. Era ils tetgauls dellas casas veglias han ornaments. Quei stil anflein nus d'Ursera tochen Schnaus.

Politicamein confinescha Schlans encunter sera e miezdi cun la vischnaunca de Trun ed egl orient e septentriun cun Breil.

Quels confins ein per gronda part fixai dalla natira. La val de Razeil, Val Malafemna, ual de Preuls e la pezza fuorman ils confins de Breil, fertont ch'ina lingia transversala, che unescha las treis vals de Fryberg, Sinzera e Punteglias indichescha presapauc ils confins de Trun. Igl emprer enconuschent document de tiarms datescha da 1506. Ei ha dau scarpanzas pervia della pasculaziun. Perquei han ins schau decider igl october 1535 ina commissiun consistenta ord il Landrichter Berther de Mustér, Moritz Henny, Ammann ab dem Übersaxen e Landrichter Jochberg. Suenter haver tadlau las parts e priu en vista il terren han quels umens fixau ils tiarms sisum la val Sinzera, sur Tiraun ed ils greps de Stablatsch. Sche la biestga mondi casualmein sur ils tiarms ora, ton dad ina sco da lautra vart, sche deigi quei buca vegnir considerau per in malfatg. Duessien ils de Schlans vender lenna sur Tiraun, deigien els seconvegnir cun Trun. Naven dil greps de Stablatsch van ils confins rectangularmein encunter l'aua de Punteglias.

Igl intsches, che schai sin la vart orientala dil vitg, ei plitost arschelauns, fertont che las aclas oxidentalas ein pli sablunusas. Per la cultivaziun de garnezzi ei il terren fetg favoreivels, ed era il pavel ei buns e savurus. Muort la gronda pendenza piteschan certs loghens tgunsch dil cauld. Ina brava sdrema uaul, che circumdat las beinsituadas pradas e sextenda naven dil vitg tochen sin l'alp 1900 m sur mar, furnescha sufficientamein lenna per il diever en vischnaunca. Il recav ordlunder ei la prinzipala resursa communalala.

A mintgin che traversa praus, pradas ed uauls croda il grond diember crappa de granit en égl, che schai pertut sternida ora e miez carschida en. Quels blocs erratics, ch'ei d'anflar tochen si en il muletg darivan dals temps glacials, nua ch'il glatscher de Punteglias empleneva la vallada e ha transportau quella giu dil massiv dil Cavistrau-Grond. L'alp cun in bi muletg ei bia memia carpusa ed exponida a malauras e producescha strusch avunda pastg per l'envarnonda de circa 200 tgaus biestga ed aunc tontas cauras. Dalunsch veseivla ei ina grossa aveina melna de crap de caltschina (Triasdolomit), che setila naven dil vitg e cala si en il tgau dil grep de Plaids. Denteren ei aunc d'enflar giep.

La maiestusa pezza cun ils treis corns: Piz Tumbiv, Cavestrau grond e Cavestrau pign aulza ses treis dets d'engirament 3200 m si encunter il firmament. Ella para ded unir tschiel e tiara e bein tuts han en legras e trestas uras sentiu, ch'il tschiel e sia pussonza ein damaneivel. Il num „Brigelser-Hörner“, che vegn savens duvraus, ha negin dretg d'existenza, pertgei quasi gl'entir massiv schai sin territori de Schlans. Quella gruppa ei gheologicamein fetg complicada. Il fundament ei granit. Sisu schaian differentas sorts crappa de caltschina, savens neidis e malsegirs plattius, traversai d'aveinas claras (Rötidolomit). Pervia de quellas curegias claras manegian enqualin, ch'il num cavestrau (cavester) seigi vegnius daus. Mo pli giustificada ei la interpretaziun dil num ord la complicada, cavestrada constituziun. Als alpinists e gheologs dat quella gruppa bia de studiar. 1865 ha Sgr. mistral Hauser cun aunc dus ded Elm fatg per l'emprema gada l'ecensiun dil Tumbiv e 1867 ingenieur Held. Theobald raquenta, ch'il plevon de Schlans seigi staus schon pli baul sin quei pez, mo quei ei scadincass mo ina detga. Ussa vegn il Tumbiv e Cavestrau savens visitaus e tut lauda la biala vista sur las alps, valladas e giu sin il glatscher de Punteglias, che schai 800 m pli profund. Era quels, che vulan seruschnar anflan adattai loghens sin il Cavestrau. Tras la porta de Frisal ei il massiv separaus d'autras montognas. Rutscheller, che ha traversau quella pezza pliras gadas numna ella in dils pli bials cuolms, buca mo della cadeina dil Tödi, mobein digl entir cantun. Mo ton pli burius eis el da macort'aura. En la Foppa vegn ei detg:

Ha il Tumbiv si tschupi  
Lai la faultsch e pren il rasti.

*Nums de praus ed aclas.*

Gulla, Bugnatsch, Razeil, Sumaglina, Plauncatscha, Plauns, Spinius, Palius, Sumaquadra, Prauliung, Davaruns, Bual, Davosigniu, Pansal, Sontgasmarias, Sutgassa, Canvals, Pett, Quadras, Runcalatsch, Acla, Fanels, Clavau s. Gieri, Lavrius, Gonda, Tuella, Cultira, Crest de Crusch, Davonportas, Tunsaua Pardi, Ratetsch, Darplauns, Tujals, Ognas Planatsch, Furschaniz.

*Nums de pradas.*

Plaun, Tiuas, Spinias, Preuls, Cadi, Cuschas, Rasadues, Ruilan.

*Parts dell'alp.*

Sur seifs, Plaun la Tscheppa, Foppa d'alp, Platta signun, Ranzeglias, Badugnia, Pradaplauna, Paliuspastg, Uaul la catscha, Fopps, Plattas, Plaunsu, Muletg de carduns, Stablatsch, Tegia de cauras, Plaunca dira, Melens, Canals, Crestvischnaunca.

*Pastiras.*

Patrutgia, Prau-Genard, Sassiala, Val casti, Chiltgera, Pardi sut, Pardi su, Igniu, Schetga.

*Parts dil vitg.*

Cadruvi, Carisch, Cantieni, Camertgeis, Cavilan, Camaninghel, Calasrosas, Sais, Lavinal (Ravinal).

Entgins numns novs havein nus schau naven. Biars ein fetg vegls e vegnan menzionai en la suondonta lavur. Ei vegn supponiu che Camertgeis fuvì liug de fiera. Quella fiera vegnevi forsa combinada cun las processions de s. Marc, sco ins ha aunc oz en l'Italia e Spagna. Era il num Davonportas lai supponer in'otra fisionomia dil vitg en ils temps vegls.

## II. Svilup historic della vischnaunca.

La vischnaunca de Schlans ha buca giugau ina rolla impurtanta en la historia. Ne sia posiziun gheografica ne sia grandezia han dau caschun leutier. Appartenent gl'origin e la fundaziun de Schlans han ins negins fastitgs segirs. Mo tenor las renomadas fossas ord ils temps dils chelts, d'ins ha anflau a Darvella, astgein nus concluder cun segirezia, che carstgauns hagien habitau cheu gia en il stgir temps prahistoric. Las cavernas de Thayngen (Schaffhausen) han gronda semegliadetgna cun cuvers en la greppa sur Schlans. Forsa d'ei reussescha d'anflar era cheu fastitgs dils habitonts primitivs, che preferevan ils aults suleglìvs, fertont che las bassas fuvan cuvretgas cun glatschers e morasts.

En documents vegn Schlans numnaus per l'empremagada en il testament digl uestg Tello 766. Tello ei staus il davos ord la renomada famiglia dils Victorins e stava sco ei para en fetg bunas relaziuns cun il convent de s. Placi e s. Sighisbert a Mustér. El ha susteniu la claustra entras considerablas dona-

ziuns en la Cadi. Quei document ei screts en in latin vulgar. La part, che sereferescha sin Schlans secloma:

Item in Selauno curtem meam cum tabulata, cum bareca, cum omnia adpertientia sua et quid quid ad ipsam curtem pertinet ex integro.

Item agrum ad Feniles mundiales octaginta confinientem ed ipsam curtem.

Quei vul dir presapauc: Medemamein a Schlans mia cuort cun nuegls, bargias, truaischs e tut quei leutier, insumma tut quei che auda tier quella cuort senza exepziun.

Medemamein il schi numnau èr de Fanels cun 80 muts graun de sem; il qual confinescha cun la sura numnada cuort.

Plinavon numna el aunc ils colonists (migiurs) Lidorius, Befanius, Sicharius cun lur femnas ed affonts et era tut quei ch'els han per agen.

Ord quei pli vegl document historic svizzer savein nus, ch'ei sesanflava cheu schon anno 766 ina cuort q. v. d. casas, nuegls truaischs etc., che appartenevan alla famiglia dils Victorins. Ina famiglia haveva l'administraziun. Nus udin denton mo dils 4 colonists cun famiglia ed agens beins. Per proprietat havevan els quei ch'els runcavan ed urbarisavan. Quei indicheschan las aclas Runcalatsch, Pustget, Ratetsch, Ognas e forsa era Razeil e Tuials.

Cun la cuort confinava igl èr de Fanels. Schegie che nus quintein circa 20 minutas per vegnir si de Fanels, cartein nus strusch, malgrad l'indicaziun en il testament, ch'il vitg primitiv fuvì pli damaneivel de Fanels. Denton puseivel eis ei, ch'il sbuau de Gonda hagi cuvretg en la veglia cuort episcopala de Selauno. Era il num Davonportas meina sin quei pertratg. Fanels vegn numnaus in èr ded 80 muts graun de sem. Nus havein cheu probabel de far cul modius roman, che fura 8,75 l. (Ochsli). Quei fagies circa 120 curtaunas graun de sem. Per nossas relaziuns in stravagant èr! Quel compigliava senza dubi tier ils 6 hodierns clavaus de Fanels aunc Gonda, Acla, Lavrius etc. Tilan ins aunc la schliatta iseglia en consideraziun, sche ston ins crer, ch'ei duvravi leutier aunc autras manutas che mo las numnadas familias de colonists. Alla cuort de Selauno appartenevan aunc beins a (ardauna) Dardin, (vicinaves) Vischnaus, (esse-Fanesse) Tavanasa, (taurentum) Trun, (campelos) Campliun. Ina aschi

impurtonta cuort haveva sco outras semiglontas bein era in administratur episcopal.

Conform il testament de Tello ein certas parts e dretgs sin territori della vischnaunca de Schlans i vi sin la claustra de Mustér. Mo outras parts e surtut la giudicatura ein restadas agl uestg de Cuera. Quei seresultescha claramein ord il rodel d'entradas de 1290. Schlans furneva:

- 7 tiers de maz (carnes) de Buania
- 2 Scheffels fava 2 dis suenter Buania
- 2 nuorsas il matg

Mintga 4 onns stuevan ils migiurs serender personalmein a Sagogn en la cuort episcopala cun quels tributs. Ultra de quei vegnevan aunc lavurs cuminas (operae) sin la cuort de Schlans pretendidas. Tenor ils urbars dil XIV. e XV. secul stavan quels migiurs era sut la giurisdicziun episcopala en Surselva-(Muntinen). Duas gadas ad onn (glendisdis suenter s. Hilari e glendisdis suenter s. Gion) vegneva ei teniu dertgira a Sagogn. Il guvernatur de leu cun in derschader de Cuera (Vitzdum) decideva las dispettas denter migiurs e patruns. Ils castitgs per cass criminals mavan en cassa dil castellan e quels dellas dispettas civilas en buorsa dil Vitzdum. Il di de dretg vegneva annunziaus sco suonda: Il mayer (administratur) de Cuera fa saver al mayer de Flém, quel dat part al mayer de Fallera, lez annunziescha al mayer de Rueun, che comunichescha a quel de Schlans, il qual lai saver a Schiffians (Vella) e da leu en val s. Pieder. Per tener uorden stuevan 12 vasals armai esser presents. Denter quels vegn in Duff Pradetsch de Schlans, Kerzer in Muntinen, numnaus. Kerzer fuvan scadincass quels vasals, che stuevan survir agl uestg cun las armas e furnir guerriers. Duront quels dis de dertgira astgava il Vitzdum schar pascular siu cavagl sin il prau sut baselgia de Sagogn e denter auter haveva el aunc 21a nuorsa sco pagaglia. Perquei stuevan las differentas cuorts furnir nuorsas sco Schlans.

Ils guvernatur dell'impurtonta cuort de Schlans vegnan era ad haver giu ina ruschaneivla pagaglia e praus sco proprietad. Sco outras famiglias ein els vegni preferi e daventaì noblezia cun ina certa independenza. Documents tschontschan da Signurs de Selaunum, Sillans, Slauns, Sellaunis.

Ord quels temps dateschan era las tuors de Schlans e lur restonzas ein aunc ussa documents historics. Mo il lungatg de quels documents ei buca dil tut capeivels, pertgei autras notizias ed indicaziuns mauncan. Quala ruina ei pli veglia e tgi ha fundau ils castials selai buca eruir. Entras paregliar cun autras cartein nus denton d'astgar pretender, che la tuor de Sais seigi pli veglia, ch'il casti de Prada. In administratur digl uestg sin la cuort de Selaunum vegn ad haver fundau ella entuorn igl onn 1000, forsa era avon. Denton cartein nus buc, ch'ella mondi anavos sil temps roman. Las invasiuns de pievels, surtut dils Hunns, havevan fatg snavurs alla glied. Quella stupenta tuor ha 3 alzadas e fuorma in quadrat de circa 8 meters per vart. L'altezia corrispunda per completar il cubus. La miraglia de 2,5—3 meters grossezia ei ord crappa pauc luvrada ora; sulet las cantunadas ein martelladas bein. L'entrada era si en la tierza alzada. Cun scalas e sugas savevan ei intrar en la tuor, che surveva a tuts ils habitonts della cuort cun lur raubas sco refugi. Cun crappa e fiug fava ei tgunsch pusseivel, de sede-fender encunter pussents inimitgs. Las 4 alas tetg schischevan sin blocca, che ha buca pudiu resister. Sco stabla habitaziun ha quella tuor mai surviu, pertgei las 2 empremas alzadas fuvan quasi dil tut stgiras. La tuor fava buca il liug de sgarschur, mobein il centrum, entuorn il qual purs e mistergners seraspavan. Per utensils, iseglias ed uaffens procurava la glied de mistregn; victualias e teilas furnevan ils purs, aschia ch'ina tala cuort fava quasi independenta d'auters loghens. Cheutras carscheva l'impurtonza dils guvernatur, che carschentavan lur facultad privata ed ils dretgs visavi ils migiurs e serviturs. Surtut en igl XI. tschentaner han quels ministerials acquistau ina giurisdicziun territoriala sur della cuort ed aunc ina giurisdicziun personala sur dils colonists. Quella immunitat territoriala scludeva ils conts da funcziuns puplicas sin la cuort, ed ils ministerials vegnan agens signurs e prendan il num della possessiun. Aschia ein sco auters era ils nobels de Schlans savanzai. Quels vegnan ad haver baghegiu il casti sin il grep, che sesaulza sco ina bastiun denter las vals cun ina magnifica vista sur la vallada. El fava era in'ustanza per la via veglia, che manava sur Cartatscha-Schlans-Plaids e Breil. L'entrada fava mo da vart septentrionala

pusseivla. In foss de varga 10 meters ladezia e 6 meters profunds segirava quella vart. Ina pun uneva il casti cun la Prada. Quella fatschada exponida ad attacas fuva fetg massiva. Las autras restonzas ein mo de miraglia pli fleivla ed ins astga crer, ch'il bia fuvì baghegiâu de lenn. En la cantunada S-O s'alzava ina tuor rectangulara de circa 4 e 2 meters varts. Ins astga sponer ch'ei seigi era stau leu ina caplutta. En quei cass survegn la detga, ch'il fetg vegl zenn gotic, che stat mets en in encarden dil clutger baselgia, darivi giu da quei casti, in fundament. Quella ruina vegn era numnada Salons, per distinguer dalla tuor de Sais. Las restonzas ein buca sufficientas per saver reconstruir in maletg exact della residenza dils nobels de Selaunum. Il num „Val Casti“ ei semantenus, aschiglioc plaidan las ruinas mo in continuau: Sic transit gloria mundi.

Entras uiaras ed autras bravuras han ils nobels de Selaunum buca acquistau honors. Els manipulavan meglier cun faultsch, rasti e badel, che cun spadas e turschets ed han senza dubi merets per il svilupp della vischnaunca. En il XIII. secul vegnan commembers de quella famiglia numnai ensemen cun outra noblezia sco perdetgas. Waltherus de Sellaunes fuva canoni a Cuera e ha tier sia mort fatg si daners per ina baselgia de Nossadunna. 1228 fuva Albertus de Slauns ministerial a Cuera. Conradus de Slaunis fuva prelar della s. Crusch ed haveva sco tal ina certa entrada. Marcuardus de Sellaunes ei vegnius mazzaus ed ha fatg si ina vegna<sup>1</sup> per ina baselgia de Nossadunna. Era il spiritual Rudolfus de Sellaunis ha sin sia mort fatg si a quella baselgia in paramen de 40<sup>1/2</sup> soldi valetta a quella baselgia. Nua quella fuva ei ina damonda.

La veglia famiglia dils nobels de Schlans ei scadincass mort'ora en il XIV. secul. Plirs de quels purtavan il vestgiu sacerdotal. Direct ne indirect ein lur dretgs e la facultad i vi sin la nobla famiglia de Grünenfels, che haveva ina massiva tuor sin in ault visavi Uors da vart seniastra dil Flém. Ils Grünenfels fuvan ina dellas pli impurtontas familias dil XIV. tschentaner e parentai cun tut la noblezia en Rezia. Margreta de Grünenfels ha spusau Heinrich de Montalt ed Anna de Grünenfels ei mariada cun Simon Montalta. Ils Montalta vegnan cheutras en pos-

<sup>1</sup> A Termin?

ses de Schlans, che vegn da cheu naven adina numnaus ensemen cun Grünenfels. Heinrich de Montalta ei per la secunda gada maridau cun Adelheit de Belmont, vieua de Heinrich de Razen e sora de Walther de Belmont. Cun quel viveva H. Montalta en carplina pervia dell'ierta. Quella discordia ha inquietau tut ils nobels della Surselva. Igl uestg ha scommunicau Montalta. Per far ina fin a quella malperinadad han ei teniu ils 16 de december 1357 a Mustér sin libra plazza ina fetg impurtonta radunonza sut il presidi digl avat Buochorn. Heinrich de Montalta metta giu cheu in solemn engirament cun ils treis dets alzaì encunter tschiel de desister per el e ses artavels per tuts temps dil casti de Grünenfels, della fortezia de Schlans, gliud e beins leutier e tut quei ch'el posseda en Surselva e Lumnezia, la giurisdicziun, il dretg de bandischar, la pastira, praus, uauls e beins anflai e buc anflai sco el ha artau e gudiu entochen dacheu, en favur de siu quinau Walther de Belmont.

Igl avat Jacob de Buochorn e 10 auters signurs firman la brev sco perdetgas e mettan lur sigil. Quei factum ei impurtonts buca mo per la historia de Schlans, mo surtut perquei che nus anflein cheu il sem della Ligia Grischa, che levà oravontut evitar dispettas denter ils signuradis e schar decider in'atgna dertgira. Walther de Belmont ei quei curaschus cavalier, che ha rimnau umens e femnas de Lumnezia e battiu ils inimitgs de Montfort e Werdenberg a Porclas. Schegie maridau duas gadas, eis el morts senza descendenza 1371. Tras la sentenza de Mustér era el vegnius en posses dall'entira facultad dils Montalta. Ei haveva midau pursepen cun quella famiglia. Mo paucs meins pli tard ha Walther de Belmont giu compassiun cun sia sora e quinau. Ils 23 d'avrel 1358 empermetta el de schar guder Heinrich Montalta ses beins piars, per il tscheins annual ded in pfund peiver e dus vons, che croda da s. Martin. Sche la lètg de Heinrich ed Adelheit vegni benedida cun affons, deigien quels artar la facultad, cass cuntrari tuornien ils beins anavos a Walther de Belmont ed a ses artavels.

Quella lètg ei restada senza descendenza. Tuttina ei la facultad ida vi sin Simon Montalta, frar de Heinrich. Sia feglia Elisabeth ei maridada cun Ulrich de Haldenstein. Suenter liunga ponderaziun vendan els tut lur ierta da vart dils Montalta ad

Ulrich Brun de Razen, per 1000 renschs. Il contract han ei fatg a Cuera ils 29 de november 1378. Ulrich de Haldenstein ei gleiti morts, e la vieua Elisabeth ei maridada cun Ritter Johannsen de Hallwil. Sco dunschala de Hallwil quittescha ella 1382 de Daniev de haver retschert ils 1000 renschs dil Brun de Razen.

In onn pli tard survegn quel aunc sco schenghetg de ses quinaus, Hugo e Heinrich de Werdenberg, la cuort a Schlans. Tochen dacheu havevan quels frars giu schau vi per tscheins ella alla famiglia Johann Ringgen. Co fuvan ei vegni en posses de quella? Ord il plaid cuort (Mayerhof) savein nus concluder, ch'ei seigi la madema, ch'igl uestg Tello ha giu fatg si alla claustra de Mustér 766. Quels de Werdenberg-Heiligenberg ein stai protecturs della claustra, e sco tals han ei capiu de trer quella cuort a sesez, sco quels ugaus havevan la moda. 1383 vegnan pia ils Bruns de Razen en posses quasi dell'entira vischnaunca, e nus essan arrivai ord quellas scumgiadas e virivèris de signurs puspei a Fanel, nua che nus havein entschiet la historia.

Entginas aclas eran proprietad della famiglia Pultengia, mo havevan ina gada fors era udiu alla claustra cun la numnada cuort. Anno 1377 miez mars a Mustér venda Ulrich de Pultengia ad Ulrighal von Aval de Schlans ses beins leu per 42 marcs (Kürschnermarchen). Quels consistevan ord:

1. Siu funs numnaus Quadras davos castiel oz = Quadras
  2. 3 juharta<sup>1</sup> èr a Mezavia . . . . . „ = Sut-gassa
  3. 1/2 juharta èr sur la crusch . . . . . „ = La Crusch
  4. L'acla numnada Fretzanigs . . . . . „ = Furschaniz
  5. 1 juharta èr sut Pardiel . . . . . „ = Pardi
  6. 1 juharta èr sut Anöv . . . . . „ = Tunsaua(?)
- cun nuegls, casa, pastira, uaul, aua, acquaduct e tuts dretgs, sco adina gudiu e possediu.

Ulrich de Pultengia fa quella vendita sin cussegl dil cusrin Clausen, bab digl avat Pieder de Pultengia, fundatur della Ligia Grischa<sup>2</sup>. Il cumprader U. von Aval e sia descendenza vegnan buca numnai pli en documents. Senza dubi stava quella casa, che vegn numnada ensemen cun la pastira, dapersei dils auters vischins e subdits de Razen. La midada dil plaid d'Aval en

<sup>1</sup> 1 juharta = 249 peis liunga e 120 peis lada = 3 modi.

<sup>2</sup> Quella famiglia possedeva era las „Marias“ a Trun.

Vilan = Cavilan ei ualti probabla. En vegls rodels figurescha la schlateina De Vella, pli tard Tuella. Aunc oz stattan ils praus de Tuella sut Pardi sco 1377.

Ils baruns de Razen han uniu lur possessiuns a Schlans cun quellas ad Uors, Dandiast, Siath, Pigniu e Rueun tier il signeradi dil *Munt s. Gieri*. Il castellan dil Munt s. Gieri era il suprem derschader. Ils castials en ils differents loghens vegnan buca duvrai pli e crodan en decadenza, aschia era nies casti si Prada e la tuor de Sais. Cul temps han las vischnauncas survegniu il dretg de proponer derschaders, ord ils quals il castellan fageva las nominas. Per la giurisdicziun stuevan las vischnauncas dar nuorsas ed anseuls (Lämmerzehnt), sco igl urbar de 1473 muossa si. En il signeradi dil Munt s. Gieri han ils baruns de Razen era practicaun la via contraria. Els proponevan in diember umens e las vischnauncas savevan eleger ord lur miez ils derschaders. Per practicar quei dretg, vegnan ils umens ensemen, ed il cumin ded Uors ei scaffius. En il menaschi de vischnaunca han ils de Razen buca semishedau. Quellas han senza dubi schon de quellas uras atgnas suprastonzas.

La Ligia Grischa 1424 ha nominau la dertgira dils 15 derschaders e scaffiu cheutras ina auctoritad giuridica, che ha influenzau pli e pli la legislatura e gidau las vischnauncas e privats tier l'indipendenza e libertad. Las 8 veglias dertgiras sin territori della Ligia Grischa havevan impurtonza subordinada. Mo las fatschentas penalas udevan ad ellas e la spada davan ei buca ordamaun. Pli tard han ei aunc surpriu fatschentas d'administraziun, sco per ex. ils uffecis en Valtelina, la tratga, la clamada, il militèr. Cheutras han ils cumins manteniu ina certa auctoritad ed ils mistrals eran „aultstimai, sabis e perderts signurs“.

Mintg'onn de s. Gieri vegnevan ils 29 delegai (mess-missi) a Trun per eleger ils emploiai della Ligia. Il cau della Ligia Grischa vegneva numnaus Landrichter. Sia elecziun vegneva annunziada al pievel cun tucar il zenn grond a Trun. 1453 ei Caspar Planca Landrichter.<sup>1</sup>

<sup>1</sup> Ei vegn ruschanau: Caspar tenevi crieç, probabel a Cultira, ch'el ha udiu il zenn grond de Trun. „Ussa han ei mess Landrechter, tgi po quei esser?“ ha el detg a sia glièud. En pintg'uriala seigi in pot vegnius da Trun e Tiraun si tier el cun la nova, ch'ils mess-missi hagien elegiu el sco Landrechter.



pauc obedeivels subdits. Già 1472 cumpra igl uestg Ortlieb von Brandis il signuradi, senza la Renasca e las minieras de Rueun per 1200 fl. Suenther paucs meins ei il Zoller endriclaus da sia vendita, ed igl avat de Mustér, Johannes de Schöneck, che paga 1800 fl. survegn il signuradi. Sut la claustra ein Schlans e las outras vischnauncas restadas tochen il temps della „Mediazium“ (1803). Beincapiu, tras quella cumpra ei mo la giudicatura ida vi sin igl avat. Las veglias dieschmas e tscheins, ch'ils de Razen retergievan, ein era dacheudenvi restai als possessurs dil casti de Razen = l'Austria. Quei seresultescha ord il rodel de dar la Culengia<sup>1</sup> (Tscheins) 1762:

Anno 1762 ein els vegni perina ed han fatg ina declaronza e mess en scret, cons bluțgers ei hagien mintgin e mintga cons onns ei stoppien dar la culengia.

Il Statthalter Giel Vincens ed il Bistgaun Pfister ston dar 1 baz ad onn, porta de dar ina gada mintga 20 onns ina nuorsa culengia ed ina gada mintga 19 onns ina nuorsa culengia.

Igl assistent Tschégn de Cantieni sto dar 1 baz ad onn, porta de dar ina gada mintga 20 onns ina nuorsa culengia ed ina gada mintga 19 onns ina nuorsa culengia.

Il Hans Luzi von Chresten ha sin il Canvals de dar 5 baz ad onn, porta de dar mintga 4 onns ina nuorsa culengia.

Igl assistent Mathias Cantieni ha de dar 16 bluțgers ad onn, porta de dar mintga 5 onns ina nuorsa culengia.

Il mistral Gieri Antoni Cantieni ha de dar 16 bluțgers ad onn, porta de dar mintga 5 onns 1 nuorsa culengia.

La Scolastica Caprez sto dar 12 bluțgers ad onn, porta de dar mintga 7 onns ina nuorsa culengia, e quella culengia della Scolastica Caprez sto il Giachen Andriu Monn dar sin il frust prau, ch'el ha giu cumprau giu Canvals della numnada S. Caprez.

Il Gion Gieri Petschen sto dar 4 baz ad onn, porta de dar 2 gadas mintga 5 onns ina nuorsa culengia ed ina gada mintga 4 onns ina nuorsa culengia. E quella culengia sto vegnir manada vi Uors l. F. ils 16 de matg, il temps veder a miezdi, las dudisch.

E quels, che han de dar la culengia, ston quintar quei onn, ch'ei dattan la culengia.

<sup>1</sup> Muoth, „La Culengia de Schlans“.

Las contribuziuns als de Razen han cuzau entochen, che Razen ei seunius cun il cantun Grischun, nua che la reghenza cantonala ha rugalau giú quella grevezia entras ina convenziun ils 29 de December 1819. Ei glei vegniú fixau:

Uors	cun fl 1,12 cr	tuca de pagar al cantun fl 20,48 cr
Dandias	„ fl 15,19 cr nuorsas 6	„ „ „ „ „ fl 491,—
Rueun	„ fl 20,6 cr nuorsas 3	„ „ „ „ „ fl 452,40 cr
Siath	„ fl 6,6 cr	„ „ „ „ „ fl 106,—
Pigneu	„ fl 7,30 cr	„ „ „ „ „ fl 130,—
Schlans	„ fl 77,52 cr nuorsas 4	„ „ „ „ „ fl 1488,20 cr

Quels daners ein vegni surdaí a mistral Depuoz, che ha pagau alla reghenza il fevrèr 1821.

Il contract de vendita cun la claustra de Mustér 1472 fuva buca propi clars, e quella ha giú bia dispetta pervia dil signuradi dil Munt s. Gieri. Sco dapertut encureva il pievel e las vischnaucas l'indipendenza. La claustra numnava il prefect, che habitava en il casti sut Uors ed administrava ils beins claustrals. Sco emprem administratur vegn Johann Capaul numnaus. Quel fuva forsa de Schlans, pertgei ils vegls rodels de mortoris numnan giunchers e ritters de Capaul a Schlans. Dispettas e forsa era basegns finansials han motivau la claustra 1539 de vender il casti dil Munt s. Gieri cun ils beins de Starpuns e Gyrs a Mathias de Rungs d'Uors per 500 fl, il qual ei s'obligaus de mantener il casti e la caplutta leutier. Mo quella empermischun ei buca vegnida exequida. Oz resdan mo las ruinas dils signurs, dellas rihezias e dils solaz en il casti de Jörgenberg — e tenor la detga compara da temps en temps en notgs burasclusas la giuvna dunschala dil casti orasum il grep e plira spetgond sin il liberatur.

1734 ils 20 de matg ei la vischnaunca ded Uors secumprada libra della giudicatura ed acquistau aunc casa, curtgin e nuegl e cheutras sefatga totalmein libra dalla claustra per la summa de 4500 fl. Per pagar quei eis ei vegniú collectau en ils cantuns reformai. Las autras vischnaucas ein restadas sco tochen dacheu sut la claustra. Visavi la Ligia ha ei era dau negina midada. Las 5 vischnaucas havevan 6 onns ed Uors 2 onns il mistral, che fuva per regla era deputau silla dieta (Puntstag). Il convent ha survegniú il dretg d'erreger a Rueun la fuortga e perschun, mo beins astg'el buca cumprar. Dandias ei vegnius fixaus sco

liug de dertgira civila, nua la claustra pudeva buc' intervegnir. Naven da 1723 retscheiva la claustra era nuot en cass de mortoris. La dertgira penala serimnava per regla a Rueun ed ils castitgs fixai mavan en cassa della claustra. Persuenter stueva ella pagar las spesas de dertgira e d'inquisaziun. Mintga derschader obteneva 36 baz a di, il weibel e scarvon 18 baz. Per la nomina dil mistral saveva la claustra far 4 (pli tard 3) proposiziuns ord las qualas el vegneva elegius sin cumin. Mintg'onn vegneva ei teniu cumin a Rueun per regla Glendisdis-Tschuncheismas ne il mardis. Igl avat stueva vegnir envidaus leutier. Era las sessiuns della dertgira stuevan vegnir notificadas agl avat, pli tard aunc agl oberkeit della Cadi, che termetteva ina delegaziun („Zusat“) de 1—3 umens. Quels havevan buca il dretg de votar, mobein de renviar ne approbar la sentenza. L'invitaziun leutier fava quasi adina sco 1795 la suondonta:

Ault honorai, sabis e perderts Sgr. Mistral e Cussegl!

Cars fideivels confederai.

Sin il present temps sesenflein nus enten circumstanzias de a Vus nos fideivels e cars confederai, notificar, che nus seigien fitschenta en in process criminal, e per menar quel a la fin seigen enten necessitat de suplicar vossa aulta assistenza, ed aschia exortein nus, vus nos fideivels e cars confederei deigies suenter veglia izonza termetter igl ordinari zusat sin ils 12 de Genner a che quel vegli seschar sin il determinau gi a bun ura s'anflar egl ordinari liuc, sinaquei chei sappi vegnir prosequiu il dretg cun segira speronza chei vegni tenor vegls vertrags et izonzas a vegnir correspondiu serecomondein nus ensemblamein a la Protecziun digl omnipotent Diu.

Dau ils 9 de Genner 1795.

Massa lavur haveva la dertgira buc ne per dispettas civilas ne criminalas. Leschas deva ei paucas e la pusseivladad de rabitschar tier in process, era pli pintga, che quei ch'ils advocats han ussa. Sco fundament e norma valeva la convenziun fatga la cureisma 1479.

Lezza ha presapauc il suondont cuntegn:

1. Tgi che mazza cun ponderaziun piarda veta e rauba. Quel che mazza senza fraut, deigi vegnir castigiaus sco la dertgira anfla per bien.

2. Mintgín deigi viver en pasch; tgi che rumpa ella deigi vegnir admonius 3 gadas e suenter pagar 1 Mark e mintga gada il dubel.
3. Quel che rumpa il plaïd e fa dispettas, paga 10 Marks.
4. Il columniader paga 5 Marks.
5. Quel che fa donn vid casa e baghetgs, paga 5 Marks.
6. Tgi che baghegia ne sega sur ils tiarms ora, paga 1 Mark.
7. Il fugitiv, che vul mitschar della dertgira, paga 5 Marks.

1674, 1706, 1715, 1718, 1720, 1722, 1725 e 1766 ein mintgamaï novs puncts vegni vitier.

Seriusa fuva la dertgira cun ils laders. 1761 il matg vegn Hans Jöry Pitschen de Schlans inculpaus de haver engulau la caldera d'alp. Ils mussaments ein buca clars. La perdetga prinzipala — ina femna de Danis — plaïda fetg tendenzius. Mo la sentenza ei: Jöry Pitschen dei esser bandischaus per 40 onns ord igl itsches dellas 3 Ligias e de lur tiaras subditas. Sia facultad croda al fiscus. Spesas dil process 70 fl 54 cr. Persunas anfladas mortas stuevan star sil plaz tochen che tut igl oberkeit compareva, tochen 10 dis. Entuorn 1718 ha ei dau denter ils vischins de Schlans ina liunga e nauscha dispetta pervia della pasculaziun cumina si prada. Las partidas ein finalmein vegnidas quietadas entras ina decisiun della dieta (Puntstag). Quella dispetta ha suenter nies meini dau caschun tier la canzun dils mats de Schlans, sco ei fuva pli baul moda de duvrar quella via satirica. Ina strofa che sereferescha sin quella dispetta ed ils custs dil process secloma:

Sil crest vischnaunca han sedau. viva.

E il suenter han dertgiau viva, viva. viva la libertad.

Gieri Giusep quel er il pli fin, viva.

Havev' en sac gnanc *in blutzgerin* viva, viva, viva la libertad.

Per cumpras e venditas valeva la „tratgia“. Ils parents havevan igl εμπrem dretg de cumprar. Il temps de star en „tratgia“ cuzava 1 onn, 6 jamnas e treis dis. Enteifer quei termin saveva in pli tierparents annular il marcau serau giu cun in auter; p. ex. 1797 process de Statthalter Tschégn Cantieni cun G. Benedetg Rothmund pervia d'in iert. Paucs dis avon d'il termin seigi spiraus, retila Cantieni il contract. Igl intent della „tratgia“ era de mantener ils beins en famiglia. Famiglias

setratgas neutier havevan mal far. Mo talas astgavan sedomiciliar, che havevan ina facultad de silmeins 500 guldas.

La dertgira seocupava era cun igl incasso e la repartiziun dellas intradas ord las tiaras subditas (Munt s. Gieri haveva Morbegno). Quels daners vegnevan reparti sin las vischnauncas tenor votants. 1787 ha la dertgira decidiu, ch'era ils mats en survetsch militèr jester che possedièn a casa silmeins 300 fl hagien il dretg de quellas pensiuns. Quei onn haveva:

Uors 166 vuschs, Dandiast 75, Rueun 122, Pigniu 22, Siath 82, Schlans 37 vuschs a 10 fl per vusch. Ei fus stau meglia de buca tisanisar ils talianers sin tala moda, per ils paucs raps ch'ei tucava a mintgin. —

Quasi onn per onn fixava la dertgira ils prezis per products e victualias, quei vul dir ei vegneva fatg „la clamada“.

Clamada per products e victualias el signeradi dil Munt s. Gieri.

	1793	1794	1798	1815	1819	1822	1835	1844	
Piaun d'alp la crena	24	20	27	30	28	27	30	32	crizers
Piaun de casa „	—	—	24	24	24	24	26	28	„
Chischiel d'alp „	8-10	8-10	12	10	9	9-10	10-12	11	„
„ veder „			16	16	16	16	16	18	„
„ de casa „	6	6	8	8	7	6	8	9	„
Salin, la curtauna	48	44	56	60	56	52	56	60	„
Segal „	40	34	48	48	44	40	46	48	„
Dumiec „	32	30	32	32	30	24	30	32	„
Scandiala			40	36					„
Mistira „			44	40	42				„
Truffels „	.	.	.	.	.	.	.	10-12	„
Panetscha	.	.	.	.	.	.	.	1 fl 1,52	
Seif culau	.	.	.	.	.	.	.	40	40 „
Carn nova d'armentiv la crena	.	.	.	.	.	.	.	10	10 „
Carn vedra „	„	„	.	.	.	.	.	20	24 „
Carn piertg nova	„	„	.	.	.	.	.	20	20 „
Carn piertg vedra	„	„	.	.	.	.	.	36	40 „
Schunscha vedra	„	„	.	.	.	.	.	40	„
Tschareschas tostas neras la curtauna	.	.	.	.	.	.	.	fl 1	
Tschareschas tostas cotschnas „	„	„	.	.	.	.	.	48-52	„

<sup>1</sup> 1 Gulden valeva 20 fl = rensch; 1 fl = 70 blutzgers; 7 blutzgers = 6 X = crizers = Rizzers; 4 X = 1 baz; 1820 valeva ina nuorsa fl 2.30.

La revoluziun franzosa ha empleniu las tiaras cun sgarschur e tristezia ed ei cun sias ideas era passada sur ils confins svizzers. Cun spada e fiug ein quellas ideas vegnidas semnadas. Armas fan sponder larmas. En nossa vallada fuva quei tonpli il cass, perquei che l'Austria influenzava continuadamein ed era s'offerida de defender ils confins Grischuns.

„Ei vegneva urgiu el Tirol dils signurs

E tratg en el Grischun culs cavels de nos purs.“

Quei seresultescha era ord ils protocolls de cumin de quei temps.

RUEUN, ils 14 d'october 1798.

Sin la damonda dil ludeivel „Kriegsrat“ de cuminas treis ligias eis ei concludiu de dar nossa contingenta en'ils sequents puncts sco suonda:

1. Quels umens, ils quals vegnan a stuer mover, ha il ludeivel cussegl anflau per bien de metter si 20 baz a gi per um.
2. Per quels umens a tucar de „Bolletar“ eis ei concludiu, che sche la tiara pagass buca, sche deien mo nossas 4 vischnauncas bonificar ne pagar lur schuldada ed en cass, che la tiara pagass in sold pli aul, sche possien ei era salvar e quels umens che dein trer, dein sin mardis allas 8 uras esser „marschfertig“ a Rueun.
3. Quels umens scavets ha ei tucan a Uors e Dandias e quellas vischnauncas dein era per la dueivla sustentaziun numnar sco „Reisgeld“, uaffens e muniziun, allura star a quen cun tschellas vischnauncas.

RUEUN, 29 october 1798.

1. El cumin dei vegnir fatg ina generala clamada.
2. Eis ei scomondau sut peina de 10 crunas de vender raubas mangiativas per glied e tiers ord il cumin. Quels che han dapli che per lur diever ston dar, schiglioc ei igl oberkeit autorisau ed obligaus de prender e parter ora.
3. Far provisiun de pera tosta, ina curtauna per vacca; quels che han furs e negina biestga, ein obligai de dar a porziun.

4. Essend che Rueun ha schon giu de purtar il fasch de grevezia della truppa imperiala ed ei vegniu commondau dil „Kriegsrat“ de far quartier per nova truppa, sche dein las vischnauncas dacheudenvi purtar las spesas ensemblamein.
5. Per satisfar alla admoniziun dil lud. „Kriegsrat“ eis ei anflau necessari d'ordinar, che sin marcau calonda marsa deigi mintgin seproveder cun in „brauchbaren Gwehr“ cun bajonetta, agli qual ils mettels laian tier, quels als quals ils mettels laian buca tier, dein seproveder cun in Halumbart ne Morgenstern. En risguard igl Exercieren fuss il meini, che scadin um ch'ei habils sut ils Gwehrs, duessi treis gadas all'iamna sepresentar sil plaz per emprendre il Exercieren sut peina de dus baz per gada.

Quei ein las preparaziuns de nos buns babuns tier il combat encunter la Frontscha, la pli ferma pussonza dil mund. La victoria de Mustér e la catastrofa a Rehanau 1799 ein enconuschentas, aschia che nus savein desister da detagls. Schlans ha tenor il rodel dellas olmas piars ils suondonts umens:

1. Casper Cajacob, 55 onns vegls.
2. Martin Pfister, 59 onns vegls.
3. Giachen Luregn Cantieni, 60 onns vegls.
4. Rest Giuseppe Cantieni, siu feagl, 25 onns vegls.

Mo la revoluziun franzosa ha era purtau siu bien per la libertad de persunas e vischnauncas —, tier nus meins che en auters loghens. Cun ina certa satisfacziun suenter tonts mals fixescha la dertgira: Tras ils acts de „Mediatium“ de Napoleon ein dretgs, privilegis de giudicatura, che differentas casas ne convents possedevan suspendi e conferi allas comunitads ed aschia ei era nies cumin absolvius dils dretgs che la venerabla claustra de Mustér practicava.

1. ils dretgs de composiziun ein suspendi.
2. il mistral e 5 geraus astgan prender si indecis.
3. en cass grev sa ei vegnir clamau Zusaß umens experimentai en la dertgira per dar cussegl — (De quels vitgs dil cumin, mo buca della Cadi).
4. il Seckelmeister ha de menar il plogn.

Cheutras ha il cumin de Rueun survegniú sia totala independenza e 1819 aunc scurlau giú las contribuziuns de Razen, sco nus havein gia indicau pli baul. 1825 ei il cumin separtius en treis cuorts: 1. Dandiast, 2. Rueun e Pigniu, 3. Schlans e Siath. Mintga cuort ha siú mediatur e sa haver 2 derschaders, Schlans in onn 2 e Siath in onn 2 en la dertgira. Duess quei esser per Schlans e Siath nuncunvegnet, sche sappi quei project vegnir mídaus suenter 2 onns. La mída da ei vegnida fatga 1837, nua che Sursaissa ed Uors ein vegni uní cun il vegl signuradi dil Munt s. Gieri e formau il cumin de Rueun. Il liug della tschentada vegn da cheu naven scumiaus (Rueun, Cuort, Uors). Glendisdis-Tschuncheismas ei il di de cumin. Il manti dei haver las colurs alv-tgietschen-blau. Il november 1847 muossan treis protocolls sí, che la dertgira dil cumin vul buc, d'il Grischun separticipeschi vid l'uiara burgheisa della Ligia seperada (Sonderbund). Ella setegn vid ils conclus díls catolics a Bonaduz ed admonescha ils geraus de mantener en lur vischnauncas ruas, pasch e perinadad ed evitar scandels. Malfundadas inculpaziuns della reghenza vegnan refutadas cun seriusadad. En quei temps burasclus stavan alla testa dil cumin: Capaul, Wecker, Cadalbert, Simon Depuoz e Statthalter Lur. Giusep Pfister. Per cletg han nos conservativs giú saun pli freid d'íls liberals, che fuvan schon marschai tochen Sagogn. 1850 ein ils deivets dil cumin vegni reparti sín las vischnauncas e Schlans ha pagau fl. 57.55. Quei ei stau la davos' ovra, che Schlans ha exequiu en cuminonza cun las vischnauncas dil vegl signuradi dil Munt s. Gieri, cun las qualas ella fúva unida tras in liug ed interessant svilup historic e per las qualas la simpatia ha cuzzau ditg, gie cuozza e flurescha aunc vinavon.

1851 vegn Schlans unius cun la Cadi. Tras quella fusiun de Schlans cun 6 grondas vischnauncas cala sia impurtonza e historia sí. La lescha della natira e della politica, che mo il ferm hagi il dretg de reger e cummandar ha menau leutier. — Cun quei datum san ins concluder la historia dil svilup della vischnaunca de Schlans.

Schlans ha giú in grond diember de premurai officials de cumin. Derschaders e scarvons anflein nus ina roscha. Pli impurtontas fuvan las scharschas de Seckelmeister e Statthalter.



Il tscheins „Mungur“ fava ina veglia intrada della claustra. Cheutier udevan era certas aclas sin territori de Schlans, ch'èin buca numnadas. Mo nus supoin, ch'èi seigi las confinontas aclas de Lavrius, Sumaglina e Plauncatscha. 1839 èi quel vegnius fixaus sco suonda: Gliesta sil tscheins Mungur, che èi annualmeìn fl. 2.14 e de dar alla venerabla claustra de Mustér, renovada ils 5 de fevrer 1839:

Padrut Albrecht paga blutghers . . . . .	4
Giachen Martin Caduff paga blutghers . . . . .	22
Sgr. mistral Peder Ant. Vincens paga igl onn pèr	8
„ „ dusp	9
Gion Gieri Vincens . . . . .	6
María Catrina nata Cantieni, maridada Petschen .	23
Ils affons de Gion Lur. Pfister pagan igl onn pèr	2
Ils affons de Giachen Pfister „ „ „ dusp	2

Quels tscheins èin pèr el temps della nova constituziun federala 1848 vegni capitalisai e pagai.

### III. La baselgia.

A pèr alla historia civila va la historia della baselgia. En relaziuns aschi constrenschidas sco a Schlans savess ins tertgar, che quellas duas pussonzas seigien unidas. Mo na — —. Sche nus sespruein de suondar la trav en la historia ecclesiastica de Schlans, sch'anflein nus enqual stargida ord zuolc, che selai buca controllar. Ins pudess supponer, ed enqualin pretenda, che la claustra de Mustér hagi gleiti suenter sia fundaziun baghiau sin intschess de Selauno ina baselgia. La pastoraziun fuss stada da Mustér anora tgunsch pusseivla, tonpli che la claustra havevi en igl 8—9-avel secul circa 200 conventuals. Mo quei èi buca stau il cass.

Tenor dretg german e franconic<sup>1</sup> udeva la baselgia tier las casas per diever dils avdonts e saveva sco quellas vegnir artada e regalada. Tuttas baselgias e claustras sin terren dil stadi udevan al retg, che nominava ils spirituals. Tras quella practica ha igl uestg piars l'administraziun sur baselgias en Surselva, las qualas el haveva pli baul guvernau libramein. Ils Victorins fuvan administraturs dil retg ed aunc uestgs. Senza

<sup>1</sup> 536 èin ils Francs daventai patrums della Rezia.

dubí han els schau construir sin l'impurtonta cuort de Selauno ina baselgia. Cu quella famiglia ei stizada, ha la pussonza dil retg priu il surmaun. Seriusamein vegneva ei garegiau dils colonists de pagar taglias alla baselgia. Biars retgs ed imperaturs fuvan promoturs dellas claustras e regalavan a quellas vischnaucas e baselgias cun intradas. La baselgia de Schlans cun sias dieschmas ei vegnida fatga si alla claustra de Favèras. Mo cu? Scadin cass gleiti suenter la mort dil Victorin Tello. Anno 998 declara Papa Gregori V. agl avat Leopoldo de Favèras, ch'el prenda la claustra sut protecziun della sedia de S. Pieder, sco ses antecessurs Zachariæ, Stephanus, Leonis, Joannis XIII. hagian schon fatg. Cun quella caschun numna el tgei baselgias audien alla claustra. „Item ecclesies cum decimis in Andeste, Iliande, Rucenne, Selaune etc.“ La claustra de Favèras possedeva pia la baselgia de Schlans cun sias dieschmas e la pastoraziun. Denton eis ei buca segir, che Schlans eri ina atgna pleiv, che seigi pli tard ida en, sco Muoth manegia; pertgei Dandias vegn era numnaus en quella bulla dil Papa e fuvava mo caplania d'Uors. La pastoraziun da Favèras anora ei forsa stada munglusa avunda. 1184 confirmescha Papa Luzius III. che las capluttas de S. Sievi a Breil, e S. Gieri a Schlans audien tier la pleiv de Breil ed apertegnien alla claustra de Mustér cun igl avat Walther. Quella caplutta de S. Gieri ei scadincass il medem baghetg, ch'il Papa Gregori V. haveva 998 numnau baselgia cun dieschma — — Tschiens e tschiens onns surveschan ils caplons de Breil era per Schlans. Batens e sepulturas ein a Breil. La via de bara mava si tras Prau-Genard, a travers las Pradas sur Spinas, Plaids a S. Sievi. Tgei stentas e strapaz fuvava ina sepultura il temps d'unviern!

Ina nova primavera en la veta religiosa ha entschiet 1518 nua che Schlans vegn separaus da Breil. Ina baselgia dedicada a S. Gieri ed a S. Culastia vegn benedida dagl uestg Ziegler la sonda avon la fiasta dil SS. Cor de Jesus. Quella stava en il medem liug della veglia ni grad dadora. Igl uestg Johannes Flugli ha visitau la pleiv de Schlans 1643 ils 22 d'uost e descriva la baselgia. Il plantschiu sut fuvava de cement; enstagl arviul havevan il chor e la nav in planschiu de lenn. Igl altar grond haveva a miez il maletg de Nossadunna e suren para-

dava S. Gieri. In altar pign de S. Culastia stava en in encarden dil chor. Plinavon fuvan leu il crap de baten ed ina trucca per la paramenta. Il tabernachel fuva da lenn ed ordadora suleraus, il cibori muncava, mo dus calischs ed ina monstronza fuvan cheu, plinavon 4 candalors ed ina crusch de mésch. Maletgs cuvrevan la fatschada e la part sur la porta. La tuor quadrata cun 3 zenns e negina ura haveva in tetg de lenn. La scantschala ed il „tischamber“ muncavan, il chor fulenaus cun 2 altars, crap de baten e trucca; la nav, che fuva probabel lada mo sco il hodiern chor, fuva reservada per il pievel. Ei fuva stretg, d'il spìritual giavischava in altar de far si el liber silmeins cu las processions de S. Gieri vegnien. Ils maletgs sin la fatschada vegnan ussa discuvretgs orasut la maula. Els representan la naschientscha de Jesus e probabel aunc il truament dil giuvanessendi. La baselgia ed il clutgèr fuvan pli bass. In mir dil clutger fuva ornaus cun maletgs ord la s. scartira e dallas occupaziuns dil pievel, fertont che S. Christoffel paradava sin la fatschada encunter sera.<sup>1</sup> Tut, baselgia e maletgs en fuorma gotica. 1671 ei la baselgia vegnida engrondida e cun treis altars, sco ella ei oz. Ins ha fatg ella pli lada e forse pli liunga e salvau la fatschada e la tuor della veglia e mess v-tier il tischamber. Empau alla gada sco la cassa lubeva han ei mess la baselgia en il hodiern stan. Ils dus altars pigns portan il datum 1671 e 1675. Ils zenns ein ord ils onns 1656, 1673, 1695 e 1718 e darivan da differentas firmas, aschia ch'els se-cordeschan buc. 1834 ei la scantschala vegnida construida e per coronar l'ovra dus onns suenter ina orgla per fl 450. Dalla baselgia veglia ein aunc ussa certas caussas conservadas per ex. ina monstronza, in calisch, statuas de S. Culastia e S. Bistgaun ed in zenn, che stat méts en in encarden. Menziun lein nus aunc far della biala secunda monstronza. ina fina lavur gotica. Ella datescha da 1854; il tronpretendent della Frontscha, Duca de Chambord, ha dau 105 fr. persunter entras nies compatritot Sep Antoni de Caduff, che stava tier el en survetsch sco instructor d'armas. La pleiv ha empermess de suffragar per il niebel donatur mintg'onn la fiasta dil SS. Cor de Jesus.

<sup>1</sup> Era quels maletgs ein ussa discuvretgs.

Suenter ch'in stemprau hagi disfatg la part lenn dil clutger, ei quel vegnius reconstruius dad in cert Barochi en la fuorma hodierna, che secroda stupent cun las casas lenn.<sup>1</sup>

Ina amureivla posiziun ha la caplutta de Nossadunna della neiv sper la veglia e massiva tuor. Pader Giusep Pontenico, capuciner della provincia de Brixen della missiun retica ha benediù en il fundament della caplutta ils 23 de matg 1679 e fuva auctorisaus leutier dagl uestg Walther de Mont. Ella ei vegnida consecrada 1683 il zercladur dagl uestg Ulrich VII de Federspiel. Bials ei il maletg de Nossadunna della neiv, fertont che las statuas ein malfatgas. Dil tut falius ei il colurem d'aunghels sin gl'arviul, ch'ei bials mo per la fantasia affonila — che lai popular quels la vischnaunca. La caplutta ei ualti beinstonta, e pli baul fuva ella economicamein in benefeci. Ella empristava ses capitals fetg raschuneivlamein, e bein enqualin, buca mo de Schlans, ha cheutras saviu segidar.

Ensemen cun quei capetel lein nus plidar sur dils plevons de Schlans. 1518 cura che nossa baselgia ei vegnida consecrada entras igl uestg Ziegler vegn plevon Joan Maria de Posclavio numnaus. Quater onns ha el pastora cheu. Mo suenter el mauncan tuttas notizias tochen 1631. Remarcablamein ein 1625—26 Pitschens, Cantienis e Manisch vegni battegiai a Breil. Tenor la detga ha igl avat Castelberg era perdagau a Schlans ed evitau l'entrada della reforma, che fuva savanzada tochen Tavanasa. 1631—34 pastorava cheu Wolfgangus Liem de Trun e ha fatg atras il trest temps della muria e scret si tut ils mortoris, battens e matrimonis.

Senza quintar ils spirituals ord la veglia famiglia dils cavaliers de Selaunum havein nus mo 5 convischins, che han elegiu la clamada sacerdotala: Peter Anton Caduff, Peter Anton de Caduff, decan, Christianus Petschen, Peter Albin (1667 Dardin e Surcuolm) e Giachen Antoni Gieriet de Tujetsch, mo naschius

<sup>1</sup> Quels documents sesanflan en la cucla dil clutger, e nus savein sefundar mo sin la tradiziun.

En ils davos decenis ha ei aunc dau de metter neu bia niev e de renovar il veder. Ils premurai spirituals Stoffel, Beer e Gartmann han fatg breigias e custs ed il pievel ha era suenter forzas adina mussau premura per la baselgia. 1892 ha in Monn de Mustér fatg si il tetg clutger e ruclus giu, mo miraculamein mitschais cun blessuras.

ed oriunds a Schlans. Dus auters giuvens han studiau per arrivar tier quella clamada, mo han ord nunenconuschentas raschuns buca serau giu lur studis. Denter ils alumns dil seminari S. Nicolay a Cuera sesanflavan 1765 in Cantieni e 1741 Peter Capaul in bien cantadur e choralist.<sup>1</sup> La schlateina feminila ha senuspiu ded ir en claustra. Buc ina „sora“ ei a nus enconuschenta.

Las fiastas prinzipalas ein S. Culastia e S. Gieri, ils patrums baselgia, SS. Cor de Jesus e S. Rosari cun confraternitads. Impurtonta ei era la fiasta de S. Marcus, nua che 5 processions: Trun, Zignau, Breil, Dardin e Danis serendan a Schlans ed ei vegn fatg perdanonza.<sup>2</sup> Fertont ch'il predicatur en la baselgia fulenada sedeva tutta breigia de migliurar ses auditurs pelegrins, deva ei per regla sin cadruvi ne en ina streglia in brava sedada denter ils buobs, che havevan gia enten bitschar las cruschs dau in brav stausch. Trun e Sumvitg formavan ina partida encunter Schlans e Breil. Bein enqualin restava mo per amur de S. Marcus in onn pli ditg denter ils buobs. Fuva la caniala gronda, dava ei gliud, che profetisavan in bien onn. Per quels fuva il sedar ina causa essenziala della fiasta. Quei usit regeva buca mo en auters loghens della Svizzeria catolica, mobein era en Germania.

Ils donaturs dils praus della pervenda e calustria ein buca enconuschents. Ins astga supponer, che ils praus cun la fetg veglia grevezia de taglia alla baselgia<sup>3</sup> seigien suenter murias vegni senza patron e curdai alla baselgia. Pli baul dava ei in special caluster per la caplutta de Nossadunna della neiv, che retergieva la rendita d'in frust. In special dretg han ils buobs de Schlans

<sup>1</sup> Quels havevan gratuitamein pensiun tier ils canonics, mintgamai in onn, e perencunter stuevan ei gidar a cantar complet, viaspras etc., e far oraziun comunablamein cun ils canonics.

Naven da 1631 entochen 1930 ein 24 spirituals stai sin nossa parvenda. Plirs han pastorau cheu liung temps.

Caduff Pieder de Schlans 1652—65.

Caduff Peter Anton, decan, de Schlans 1695—1730.

Berther Gion Ant. de Mustér 1734—66.

Schmid Martin de Tujetsch 1766—99.

Petschen Christianus de Schlans 1799—1826.

Martin Schmid ei restaus cheu tochen la mort sper Sur Rest Petschen. Il temps dils Franzos seig'el fugius giu Razeil.

<sup>2</sup> Tochen circa 1902 vegnevan era Rabius, Sumvitg e Surrein.

<sup>3</sup> document de 998.

tier l'elecziun dil caluster. Cheu astgan els tener si maun e votar sco ils umens. Mo da quei dretg vegn ei strusch fatg diever. Denton sch'il caluster vilenta quels schanis, vegn ei schon enqualgadas teniu cussegl en ina bargia, de l'otra gada esser tuts encunter. — Mo quels emblidan e quei ei il meglier — in exempel per tuts christians che rogan:

„Perduna a nus ils nos puccaus, sco nus perdunein a nos culpons.“

#### IV. La populaziun.

En il testament de Tello vegnan 4 colonists Lidorius, Maurus, Befanius e Sicharius cun lur femnas ed affons menzionai. Quels san ins considerar sco patriarcs de nossa vischnaunca. Mo tier quels ha il Segner buca detg, che lur descendenza vegni ad esser numerosa sco il sablun della mar. Quei ei era buca stau il cass. Auter che dallas famiglias noblas gia menzionnadas aud'ins pauc ni nuot dil cumin pievel, ch'era buns avunda per pagar dieschmas e luvrar ils furs dils signurs. Nus udin mo ded in:

Duff Pradetsch, Kerzer (guerier) digl uestg.

Ulrigal von Aval, cumprader dils beins dils de Pultengia.

Albrecht, der Schmied von Schlans, sco perdetgia 1378 e Caspar Planka, sco Landrichter 1453 e derschader 1459.

Pli tard entupein nus ils mistrals, Statthalters, Seckelmeisters, derschaders. Ins numnava pli baul la glied en connexiun cun il liug de domicil, ni suenter la lavur, ni cun il num dils geniturs. Perquei savein nus buca pretender, ch'ils vegls documents plaidien da schlateinas el present senn. Pér il plevon Wolfgangus Liem de Trun, che ha pastorau cheu 1631—34 e fatg a tras il temps della muria, ha entschiet a menar ils rodels de battens e mortoris, sco sauda. El fa enconuschents nus buca mo cun las famiglias, mobein era cun las unfrendas della pestilenza digl onn 1631. Avon la muria ed aunc cuort suenter dumbrava il vitg de Schlans pli bia habitonts che oz. Quei seresultescha ord las suondontas indicaziuns:

1643	cresmau a Schlans	80	persunas	
1655	„ „ „	57	„	„
1672	„ „ „	35	„	„
1687	„ „ „	38	„	„

## Register dellas persunas ch'ein mortas della muria a Schlans 1631.

(Entschiet ha la pestilenza ils 21 de settember.)

- |   |                                       |
|---|---------------------------------------|
| 1. Ursula Marti Ali                     | 40. Luregn Putschaschk                |
| 2. Maria Gion Muster                    | 41. Bernard Clau Tieni                |
| 3. Mathias Paul Zutt                    | 42. Gon Andrana                       |
| 4. Albert Gion Muster                   | 43. Menga Plasch                      |
| 5. Anna Gion Tumasch                    | 44. Juchla Plasch                     |
| 6. Marti Ali                            | 45. Griata Plasch                     |
| 7. Chrest Berhard Clau Tieni            | 46. Onna Gon de Vella                 |
| 8. Gion Dunau                           | 47. Telgia Paul Barclamiu             |
| 9. Chrest digl Disch                    | 48. Hans d. Jungher Tschegn de Capaul |
| 10. Barbla Padrut Gion Casper           | 49. Barbla Piader Gon Caspar          |
| 11. Maria Marti Ali                     | 50. Paul dit Jacum Tieni Schamun      |
| 12. Stina Gion Muster                   | 51. Paul Barclamiu ed in sui affon    |
| 13. Madleina Padrut                     | 52. Balzer Wolfli                     |
| 14. Gion Paul Flurin                    | 53. Griata Paul Zutt                  |
| 15. Ursula Gion Muster                  | 54. Affon digl Risch Christ           |
| 16. Menga digl Jungher Tschuor          | 55. Anna Melcher Vigeili              |
| 17. Anna Paul Flurin                    | 56. Jacum Disch Brincazi              |
| 18. Menga Plasch                        | 57. Disch Brincazi                    |
| 19. Greta Padrut Gon Caspar             | 58. Dus affons digl Risch             |
| 20. Melcher Bernhard Gruber             | 59. Risch Christ                      |
| 21. Caspar Bernard e Clara Tieni        | 60. Ursula Putschaschk                |
| 22. Trina Marti Ali                     | 61. Trini digl Jacum Tieni Schamun    |
| 23. Menga Crest Albin                   | 62. Brincazi digl Disch Brincazi      |
| 24. Piader Gion Caspar, tutor Ecclesiae | 63. Luci Gon Sievi                    |
| 25. Paul Zutt                           | 64. Onna Gon Paul Flurin              |
| 26. Paul Flurin                         | 65. Fumia Risch Christet              |
| 27. Trina Paul Flurin                   | 66. Barbla Luregn Padrutt             |
| 28. Muster Hans Fravi de Axenstein      | 67. Grita Christ digl Marti           |
| 29. Anna Gion Muster                    | 68. Maria Jacum Disch                 |
| 30. Andeia Gon Luregn                   | 69. Ursula Lumbrein                   |
| 31. Reget Gon Luregn                    | 70. Maria Clau Tieni                  |
| 32. Ursula Caspar digl Meldher          | 71. Fumitgiasa Luregn Tumasch         |
| 33. Serena Hans Galas                   | 72. Maria Casparin                    |
| 34. Michel Marti Ali                    | 73. Luregn digl Paul Flurin           |
| 35. Tomasch Luregn Tomasch              | 74. Onna Christ digl Jungher Marti    |
| 36. Trina Paul Zutt                     | 75. Onna Melcher Jac. Aliesch         |
| 37. Anna Gion Dunau                     | 76. Trina Balzer Caspar               |
| 38. Hans Bernard Clau Tieni             | 77. Jungher Chrest de Capaul          |
| 39. Maria Balzer Wolfli                 | 78. Dus affons Gon de Vella           |

Per Schlans ei la sperdita de 82 personas ina sgarscheivla catastrofa. Surtut las famiglias Marti Ali, Gion Muster, Paul Zutt e Caspar ha ella decimau sgarscheivel. Las famiglias ded ussa vegnan buca menzionadas. Certas existevan gia. — Ch'ei seigi restau mo 13, ei ina detga.

La mort, la regentra della historia mundiala, porta continuadamein variaziun della populaziun. Carschèn e digrèn era a Schlans.

1656	dumbrava	Schlans	180	persunas
1803	"	"	130	"
1808	"	"	86	"
1835	"	"	112	"
1850	"	"	169	"
1888	"	"	175	"
1910	"	"	194	"
1920	"	"	199 <sup>1</sup>	"
1930	"	"	186	" (93 umens e 93 femnas)

Ina gronda digrèn 1808, da leu tochen 1920 ina carschèn per 113 personas. Quei ei ina bun' enzenna, enzenna de sanadad e prosperitad. Denton pudess l'augmentaziun esser pli gronda; tuttas famiglias ein parentadas, ed igl avegnir vegn a mussar las consequenzas dellas lètgs parentadas. — Bia forzas de lavur augmentan la valetta dils praus e cheutras il credit della vischnaunca. —

Presentamein habiteschan 6 schlateinas<sup>2</sup> burgheisas en vischnaunca: Caduff, Cantieni, Petschen, Pfister, Rothmund e Vincenz.

La pli numerosa ei la famiglia *Pfister*, circa  $\frac{3}{5}$  dils habitonts. Ella va anavos sin igl onn 1628, nua che Laurentius Pfister ei maridau cun ina certa Margreta. Els han giu 3 fecls: Laurentius, Petrus e Mathias, dals quals mo ils dus davos han giu descendenza.

*Caduff*<sup>3</sup> va anavos sin 1634 e ha sco fundatur: Chrest Tumasch, Barclamiu, Paul e Jakob Aliezt de Caduff.

<sup>1</sup> Cun quellas indicaziuns cheu sura suondein nus la stupenta lavur de nies conburgheis Dr. Alex Pfister, Basel.

<sup>2</sup> Sur dil svilup de quellas ha plevon Vellinger, 1875—90 a Schlans, mess ensemen ina fetg interessanta lavur, che meritass de vegnir continuada e pubblicada. Nus suondein quella.

<sup>3</sup> Ils de Caduff ein morts ora. Pli tard ha in Caduff en Fronstha astgau scriver de Caduff.

*Petschen* Petrus, filius Gon Tumasch ha maridau 1637 ina Christina de Rueun e ha giu 5 affons: Joanes, Laurentius, Jacobus Joanes e Apollonia. Mo in Joanes e Laurentius han giu descendenza.<sup>1</sup>

*Rothmund* Meldhior, morts 1648 ha giu 8 affons ed ei il fundatur de quella schlateina. Balzer Rothmund vegn numnaus denter ils padrins 1643.

*Vincenz* Gon ei setratgs da Siath a Schlans circa 1635. Cun quella caschun ha el vendiu ses beins a Siath, cun ils quals la pervenda ei vegnida fundada.<sup>2</sup>

*Cantieni* vegn ad haver circa la medema vegliadetgna. Quella schlateina ei mai stada fetg numerusa e ha giu bia commembers, ch'ei secasai egl jester.<sup>3</sup>

*Pajarola* Francesco da s. Bernarde, Val s. Giachen ei setratgs entuorn 1834 a Glion. En sia letg cun Maria Gieronimi ha el giu 5 fepls ed ina feplia. El ei secumpraus en a Schlans ils 4 de matg 1859, mo sedomiciliaus a Glion e Trun.

*Gadola* Guglielmo, naschius 1800 a s. Bernarde, Val s. Giachen, ei medemamein setratgs a Glion e fundau ina fatschenta. Pli tard ha el cumprau casa a Mustér. Ord sia numerusa famiglia han 3 fepls: Christoffel, Guglielm e Battesta giu descendenza. Ils 30 d'avrel 1856 eis el secumpraus en a Schlans.

*De Capaul* Junker Marti, ha giu 1631 Junker Chrest e 1635 Vincenti. Junker Chrest de Capaul, mistral, ha cun sia consorta Mar. Camathias giu 9 affons. Era Vincenti ha descendenza. Mo tutina ei quella famiglia mort'ora ne ida vi sin Petschen, Pfister e Caduff.

*Casper*, la veglia respectada famiglia, ha pituu memia entras la muria gronda; 1643=46 vegnan numnai: Ursula, Maria

<sup>1</sup> Senza dubi ei Petschen la pli veglia schlateina; gia entuorn 1450 vegn in Petschen de Schlans numnaus. Arch. Laax.

<sup>2</sup> Mistral Giachen Antoni Vincenz, naschius 1782, maridau 1819 cun Margreta Spescha d'Andiast ei 1814 vegnius burgheis de Trun.

<sup>3</sup> La lavur de Sur Vellinger sur dils Cantieni havein nus buca anflau. Presentamein viva Xenia Cantieni, feplia de G. Giusep Cantieni, naschida a Paris, sco pictura a Roma. Grond renomé ha ella acquistau denter ils artists cun ses maletgs de s. Clara, s. Franzestg e de Papa Pius XI.

e Rest Casper. 1672 ei il davos Vigilli Casper menzionaus sco padrin.<sup>1</sup>

Niessegner ha pertgirau nus en ils davos tschentaners da nauschas malsognas. Pli baul fuva la virola nera quasi adina cheu de casa. Dad 1—10 onns murevan quasi 52%. Entras malsognas vegnevan affons era tschocs ne schiglioc mendus. Cun virolar etc. eis ei vegniu en quei grau meglier, e strusch 10% mieran els onns d'affon. La medischina ha fatg progress.

Mo era il pievel ei en quei grau ius vinavon. Cun cardientschas blauas e strianems vegn ei buca pli operau encunter epidemias. Las habitaziuns, la vivonda ed il tractament de malsauns fuvan savens a Schlans sco dapertut munglus avunda. Glisch, sulegl e schubradad muncavan en las stivas, nua buca mo la glied, mobein era enqual gaglina e purschi malsaun avdava, e quei gidava grondamein las nauschas bacillas de malsognas. Glied veglia sur 60 onns fuvan pli rars che ussa. En ils davos 50 onns ha in fetg grond diember cuntenschiu la respectabla vegliadetgna denter 70—98 onns. La carschèn della populaziun fuss perquei pli gronda; mo circa 40% dils burgheis ein domiciliai egl jester. La caschun de fadiar il paun en tiara nossa ei ussa pli favoreivla. Avon 50—80 onns mavan mintgia primavera entiras roschas affons della Surselva sut la guida d'in um ni d'ina femna a pei giul Schuob. A Lindau, Bregenz, Friedrichshafen, ni Ravensburg vegnevan ils purs dil contuorn ed encurevan ora ils buobs ni buobas che plaschevan. Lur sort fuva en general buca schliata. Ils biars turnavan igl atun cun ina mondura nova da tgau entochen pei ed enzaconts fl. a casa. Enqualin restava era leu sur unviern ed empredevan magari in mistregn. Era da Schlans han capavels mistergners, lenaris, calgers, fravis empriu mistregn e lungatg sco sauda giul Schuob. Mo ils davos de quels emigrants ein schon sut tratsch. Aunc pli baul encurevan giuvens ina magra fadigia sco mercenaris en survetsch dil retg della Frontscha, Hollandia, dil Papa etc. 1784 anflein nus il giuven de 17 onns Francestg Cantieni

<sup>1</sup> In Jehan Gasper vegn numnaus 1569 denter quels che retergievan pensiu dalla Frontscha e 1587 puspei Jehan Casper de Jacob, ensemen cun Caspar, ministral e Crist Caspar (Dr. A. Pfister) Ei glei pusseivel, ch'il plaid ministral vul dir mistral, ed en quei cass havessan nus 14 mistrals.

en la guardia Svizzer a Paris ella compagnia dil barun Salis-Zizers. El ei probabel curdaus en la sgarscheivla mazacra dils 10 d'uost 1792 ni grad suenter en ils embrugls della revoluziun. Napoleon ha buca mo privau la Svizzer de sia independenza e libertad, mobein era sforzau ella de furnir schuldada per executar ses plans ambizius e crudeivels. Sin 200 umens stuevan las vischnaucas dar in schuldau. Quei ei forsa in motiv, pertgei Schlans dat en 1808 mo 86 habitonts e 1812 mo 23 umens.<sup>1</sup>

Christian Petschen ei ils 12 de december 1806 entaus en survetsch de Napoleon en il II regiment I battagliaun. Bials dis han ei passentau ad Avignon e Marseille e lu stuiu marschar encunter ils Spagnols. Suenter in combat encunter 18000 purs a Segovia ei il battagliaun marschus a Madrid, da leu a Valencia, puspei a Madrid, Burgos, Saragossa, Santiago ed auters loghens, crusch e travers tras la Spagna tochen el Portugal. Castelberg de Mustér cumandava il bia duront quella nauscha campagna quei battagliaun cun bia Romontschs. Mo la mesadad de quels umens ei serebitschada en Frontscha. Quasi tuts havevan survetsch militar jester toch' ils églis ed ein suenter 4 onns turnai a casa. Era Ch. Petschen ha giu la ventira de saver turnar. 1820 eis el morts a Schlans ella vegliadetgna de mo 40 onns. Gilli Michél Vincenz, fegl de mistral Ch. Luregn e de Maria Catrina Lombris, naschius ils 8 d'avregl 1784, ei staus in schuldau da tgau entochen pei. Ils 27 de december 1806 eis el gia sutlitinent el III regiment II battagliaun de Svizzers en Frontscha, el quartier de Boulogne, sut il general Gouvion de St. Cyr. Tut la sgarscheivla uiara en Spagna fa el atras: 1808 sut general Bessières, 1809 en Portugal sut general Soult, 1810 puspei en Spagna sut Kellermann. Cun major Graffenried e capitani Donaþ han ei giu in nausch combat ad Astorga. Suenter la victoria han ei stuiu gidar ils Franzos a Puebla. Ils Franzos ein sefatgs ord la puorla e schau ils Svizzers en fom e miserias. La finala battevan mo 174 umens encunter 10000 Spagnols sut general Silveira. Ils 10 d'uost han ei stuiu sesurdar, mo han pervia de lur valerusadad giu condiziuns honorificas. Ils officiers han astgau salvar las armas, e la schuldada il sac.

<sup>1</sup> Dr. Alex. Pfister „Ils Grischuns en survetsch de Napoleon“.

Malgrad quellas empermischuns han bandas rabiadas de Spagnols e Spagnolas sblundergiàu ils prischuniers totalmein e stilettau biars sin lur transport a Coruna sper la mar. Per levgiar la tresta sort de prischunier ein 66 umens entrai en survetsch militar engles e 50 ein i vi el regiment svizzer en Spagna sut Reding. Quels numnav'ins Svizzers blaus per distinguer dils Svizzers cotschens en survetsch franzos. Ils auters ein vegni transportai sin il bastiment „Delphin“ en Engheltiara. Denter quels fava era G. Vincenz, che ha da miez november astgau turnar en Frontscha a Lille. Aunc pli sventireivla per Napoleon ei sia uiaara cun la Russia stada. En quella ha Gelli surviu sut Oudinot. Senza ina natira sco fier fuss era el buca mitschaus da quels strapaz, fomaz e ferdaglias. 1814 va el en survetsch dil retg Ludvig XVIII sco primlitinent. 1814 eis el duront la blocada a Landau, 1815 ella Franche Compté, 1816 litinent el 7avel regiment della guardia ella compagnia de Caspar Latour. 1820 vegn el numnaus capitani mo ha negina compagnia e perquei era meins intrada. Per ina piazza de capitani libra 1822 vegn Ludvic Latour preferius. Quei ha vilentau nies vegl officier ed ei ha dau in duell denter els, nua che domisdus ein vegni blassai. Tgi che risguarda era la politica grischuna de lezzas uras capescha, che Latour ha giu pli bia cuida ch'il Vincenz. Cun sia consorta Maria Catherina Claus, che Gelli haveva spusau 1817 e ses treis affons eis el seretratgs per adina a Strassburg. Siu fegl ei medamamein vegnius officier franzos ed ei curdaus sco tal en l'uiara della Crim 1854.

Il giuven Sep Antoni Caduff anflein nus 1824 a Paris e Versailles tier la guardia reala en la compagnia Latour. Ord ina brev da 1828 vesan ins, cun tgei attaschadadad quei schuldau patertgiava vid siu vitg nativ.

Cun la revoluziun de 1830 ha el bandunau quei survetsch ed ei ius tier il Papa. Era da cheu anora scriva el savens a siu padrin ed ugau Statthalter Luregn Pfister. Sco ils auters Grischuns eis era el surprius della bellezza dil marcau de Bologna cun massa baselgias, il palaz dil cardinal e 13 portas. Sep Antoni ei vegnius caporal e sergent e pli tard intraus sco instructor d'armas tier il cont de Chambord, in Bourbon, che habitava a Vaniescha, Goriza e mava la stad sin ses beins a Frohesdorf,

Wiena, nua che la catscha era il principal divertiment dil cont e de Caduff. El ei maridau 1842 a Goriza. Siu feigl, naschiu 1845 havevi a Vaniescha ina fatschenta de raubas d'aur ed argien.

El medem temps cun Sep Antoni (1833) stavan aunc 8 giu-vens de Schlans en survetsch militar dil Papa. Quels ein tuts turnai ventireivlamein a casa. Els senunnan: Balzer Pfister (scarvon), Gieri Antoni Caduff, Giachen Ludivig Pfister, Giachen Antoni Vincenz, Chr. Luregn Vincenz (mistral), Gieri Antoni Vincenz, Gion Rest Caduff e Giachen Flurin Spescha de Trun, che fuva maridau cun la sora de Sep Antoni Caduff ed ei pli tard ius da Schlans giun Tiaratudestga. Gieri Giusep Pfister, naschiu 1822, ei cun 20 onns ius a Triest ed ha empiriu la confiserie. Duront 5 onns ha el surpriu il Café della posta a Goriza. Suenter ina greva malsogna ha el aunc luvrau en il Hotel Royal a Florenza e 1847 parta el dad Alessandria cun l'intenziun ded ir en China, e suenter ha nies aug Sep dau neginas novas. Sep Antoni Caduff, il cont e la contessa che cumpravan a Goriza ded el la rauba laudan sia capacitat.

Dus frars Petschen ein pli tard setratgs en Spagna e fundau a s. Sebastian flurentas fatschentas; mo las suondontas generaziuns han piars il contact cun Schlans.

Statthalter Gieri Martin Pfister ha en sia giuventetgna fatg survetsch militar en Hollandia. Ses fepls Gieri Martin e Giachen Luregn han studigiau a Rankweil tier il prof. Rheinberger e cheutras saviu prestar alla vischnaunca bia survetschs.

Ina persuna han ins buca teniu per vengonza de scriver en il cudisch de mortoris a Schlans. Ei glei la „stria“ de Camaninghel. La detga rauenta, che quella seigi fugida cun ina schuba sul tgau giu, en nuegl de Davonportas e sin quei seig'in sgar-scheivel uradi vegnius. En nuegl hagi ella strihau alla pli biala vacca sur il dies ora. Ins encurschevi tut la detta e la vacca seigi ventschida dil mal ner. In'otra gada hagi ella vuliu strienar il cavrèr en la val ded Igniu. Quel ha sedustau cun il fest, che rumpevi sco fercaglia, senza che la stria senti. La davosa buccada dil fest purtava l'inscripziun I S, e quella hagi fugentau la stria e liberau il cavrèr. Ils documents numnan ella „Stina Meningla“. Il november 1682 eis ella vegnida tgisada alla dertgira. Las indicias ein:

1. Stina seigi adina stada ina femna cun nauscha bucca, che detgiavi ni spirituals ni Oberkeit.
2. Stina hagi giu engulau entzatgei. (Probabel in fintschel, il plaïd ei buca clars.)
3. Havevi ella de far cun enzatgi, hagi ella smanatschau de mazzar.
4. En greta hagi ella smanatschau de dar fiug il vitg, e sin quei seigi in grond crap ruclaus giu.
5. Stina hagi engulau in blah strom.
6. Ella hagi stigau sia feglia de pigliar in buob e better quel en in begl ded aua. Quei fussi daventau, sch'in auter buob havessi buca liberau.
7. Stina seigi stada en ina casa e detg a quella dunna: „Jeu sebetel sur la pun Zignau giu“ ed auters turpigius plaïds aschia, che la dunna hagi catschau giuado ella cun la scua.

Ord quei vesein nus ch'ei fuva ina tupa femna, paupra dil spért, che saveva buca giudicar endretg ses plaïds e sias ovras. Mo quei ei stau sufficient per menar ella ad Uors e metter ella sil tgierl. Duront 9 dis eis ella vegnida murdergiada leu. Cheutras ha ella piars dil tut il saun giudezi e sia confessiun ei tut auter che las indizias. Ella confessa:

1. Igl emprem seigi il nauschaspért vegnius en casa sper siu létg e garegiau, ella deigi survir ad el e dar ad el habitaziun en sia casa. Ella hagi consentiu quei.
2. Ella deigi conterdir alla SS. Trinitad, Nossadunna, als sogns ed al s. baten. Ella hagi cunterdetg e giu cuminonza cun il nauschaspért.
3. Quel seigi vegnius tier ella cun in vistgiu verd ed empermess daners mo hagi dau negins.
4. Il nauschaspért hagi dau ad ella in étg ed ina forza de strienar.
5. Ella seigi stada ded arranschar in bal de strias en la val de Breil.
6. Ella hagi unschiu tiers, e quels seigien vintschi.

La sentenzia:

1. Stina Meningla deigi vegnir surdada al carnifex.
2. Il carnifex deigi menar ella ligiada tras il vitg ora sin il plaz d'execuziun.

3. Stina deigi vegnir scavazada, suenter barschada e la tschendra satrada.
4. Sia facultad croda alla claustra, che ha persunter de pagar las spesas.

Tier quei prozess ha la claustra giu termess Johann Berther sco „Zusat“. La dertgira consisteva ord mistral Jacob Sievij cun 14 derschaders. Denter quels ein Jos. Rothmund, Schreiber Johann e Junker Marti de Capol de Schlans numnai. Jacob Glaser d'Andiast, Chrest Jacob de Schnaus e Jon Tuella de Schlans havevan de pertgitar la Stina en perschun e forsa era far las torturas; Gabriel d'Uors ei ius a Cuera per il carnifex. Mistral Lorenz Wolf de Schlans ha defendiu la Meningla. Las spesas ein stadas ualti grondas. Mintga derschader retergieva dalla claustra 36 baz per di, il weibel 18 baz, la lenna ha custau 30 baz. Ord quels e semegliants quens survegn ins l'impressiun, ch'il principal fuvien buca la giustia ed il striegn, mobein la voluntad de saver fadigiar enqual baz, che fuvan lu aschi rars. Trests temps!

## V. Forzas destructivas.

Cura ch'il bab e la mumma han mediu, ligiau e purtau las grevas monas en iral, anflan ils affons aunc biars spigagliuns denter la stubla, spedadurs e bargies che foran la detta. Aschia anflins era enqual menziun d'evenements, ch'ei fuss donn de schar ira en emblidonza. Nus stuein il pli sebasar mo sin raquintaziuns verbalas e buca sin documents. En tut l'Europa ha la muria regiu 1348—50. 1363 ei ina malsogna de biestga stada fetg nauscha. Igl onn sisu han schaumnas de saleps migliaia si tut. Ils saleps cun allas cotschnas, ch'ins anfla aunc, ein suenter nosa perschasiun aunc restonzas de quella razza. 1499 ei stau l'uiara Sueva. 1556/85 ein onns della muria, ch'ei puspei turnada 1631.<sup>1</sup> 1610 ei la val Indersera ruta giuado, e quella sgarscheivla bova ha buca mo destruiu la veglia via imperiala denter Cartatscha e Schlans mobein era praus e pliras casas dadens Flutginas. Empau pli tard hagi in stemprau dar-schiu il clutger a Schlans, ch'ei suenter vegnius reconstruius en

<sup>1</sup> 1816 vegn numnaus igl onn della fom.

la hodierna fuorma. 1776 ei il Camertgeis vegnius intschendraus. Sur la hodierna fontauna de Cantieni ei il fiug ruts ora. Tut il vitg fuvava en prighel. Il plevon Martin Schmid seigi vegnius cun Niessegner tochen si Surfuorns e las flommas ein seviultas encunter Camertgeis. Dapi lu ein aunc ils dus clavaus de Davonportas e d'Acla i si en fiug. Pader Placi Spescha raquenta era manedlamein dalla sgarscheivla lavina dils 10 de mars 1817. Ella ha entschiet la notg sin il Cavistrau pign ed ei sedividida en 3—4 parts ch'ei sefulanadas da Tiraun dadens, Tiraun dadora e sur il plaun Sincera giuado. Entirs uauls de Trun e Schlans ein vegni scuai naven sco plontas de coniv. A Tiraun dado ein 2 clavaus, ina casa ed ina tegia vegni tschaffai dalla lavina. Ad Acla ed a Stavons ha ella en mintgia liug purtau naven in nuegl e sisum Darvella sfracau in nuegl cun 17 armauls ed aunc tiers manedels. Derschend pumera eis ella savanzada tochen giu Rein. Ei spurlava tochen si Zignau e sbatteva ils barcuns. Entuorn las casas e nuegls de Darvella fuvava la neiv aschi stagna, che P. Placi rabbitschava buca en il fest.

Neginas scartiras fan menziun de duas outras lavinas, ch'ei idas presapauc il medem temps. Giu dil Tumbiv ein ellas vegnidadas. In bratsch ei sederschius giu encunter il muletg e rut atras gl'ual e penetraus tochen giu en la val Friberg. Lauter ha priu la direcziun dil Lartggrond giu, traversau Pradaplauna, igl Uaul-Surseivs e vegnida tochen Pradamiez. Bials uauls giuvens ein carschi si en quels loghens devastai. Surtut igl uaul della Badugnia fuvava in delètg per mintga amitg della natira. El fuvava populaus cun bia tiers selvadis sco cavreuls, camutschs, lieurs alvas e gaglinas selvatgas. La vischnaunca saveva sperar de haver leu ina fontauna ded aur, per cuvierer las expensas. Mo cheu vegn igl avrel 1917 — quasi exact 100 onns suenter quella catastrofa, della quala P. Placi ha raquintau.

Il davos de mars haveva ei sin ils aults aunc ina grossa cozza neiv. Suenter dis de bial'aura schelava mintgamai la notg ina crusta neiv. Ils 31 de mars ed ils suondonts dis ha ei dau aunc circa 2 meters neiv sisu. Quella ei selischnada sur la vedra giu encunter igl uaul della Badugnia e mediu plonta per plonta. En treis parts eis ella seviulta giu en la val Indersera, sur Tiraun e giu en la val della Ferrera. Mellis pegns eran leu en

pintgas buccadas. Ei ha dau bia lavur de metter en pluna quei hardumbel per lenna de far pupi, e malgrad ils aults prezis de lenna ei il recav ord quei bellezia uaul alpin staus mo 5 a 6000 francs. In nuncalculabel donn.

Per completar la cronica lavinusa lein nus aunc far menziun della gronda lavina dils 28 de december 1923. Giu dellas neidias spundas da Tschégn dadens ein las frestgas nevasdas seruschnadas giu e mess en moviment ina lavina d'ina extensiun e compactadad stravaganta e sgarscheivla. Quei monstrum ha priu la via tras Muletgvèder e rut atras igl uaul la Catscha, de Preuls per finalmein sefermar giu Bual sper la via denter Capeder e Schlans. Pliras hectaras uaul, il bia de Schlans, ein vegnidas smardigliadas.

Buca mo en fuorma de neiv ha la schiglioc aschi nizeivla aua fatg a nus donnuns. Ina disgrazia ha tuccau nossa vischnaunca igl onn 1855. Ei glei la bova gronda. Ella ha entschiet sisum las pradas, nua ch'ils dutgs dellas palius erien buca slargai avunda. Suenter ina gronda dracca ei l'aua probabel vegnida giu sin terren arschelaun, che ha buca schau penetrar ed aschia alzau naven tut il material. Quel ei sbuaus cun gronda canera dallas pradas giu e magliau ora ina profunda val. Per ventira ha in carpun menau la bova dado giu, aschiglioc fuss buca mo il bia dil vitg e praus vegni menai naven, mo era buca tut la glied havess en quella stgira notg anflau in segir refugi. Tochen Prauliung ei la val vegnida magliada ora, bia pli profunda che ussa. Il Rein ei vegnius retenius e formava in lag, che mo ils tschupials dils pli aults tscharschérscudhegiavan ora. Quei fuva la notg avon la fiasta dil s. Cor de Jesus. Tgei trest sedestadar! Ils umens ein curi si Prada, nua che lur muvels fuvan. Quater clavaus e duas tegias fuvan stuli. A Prada miez havevan buobs ed umens aunc saviu liberar il muvel tochen ch'il baghetg fuva per dar ensemen. A Runcalatsch, Davosigniu, Prauliung, Sutgassa e Razeil ein 9 clavaus vegni manai naven. Donnuns! Mo cun dubla devoziun e fidonza han tuts avdons fatg oraziun tier il s. Cor de Jesus, che haveva veseivlamein salvau il vitg. Il mardis sisu suenter miezdi ha ei turnau a sfraccar e tunar. Cun il clom: „La bova vegn puspei“, fugievan la glied ord vitg. Quella gada ei in grond toc pastira

sur la seif de Prada, che haveva entras quei sbuau piars il sustegn vegnius en moviment. La massa de material fuvà quella gada aunc pli gronda. Bia mellis meters cubics tratsch e crappas ein sefultschì della nova val giu e per cletg buca bandunau quei vau, che ei vegnius pli profunds. Ils praus vischinonts semi-gliavan muschnas e gondas. Igl unviern sisu eis ei stau quasi adina terren, ed ei han saviu dustar il gliet. Bein enqual carpun ei restaus tochen ussa els peis. Ils baghetgs ein vegni postai en loghens pli segirs. Ina vertit, ch'ìls biars de Schlans possedan de segidar in lauter, ei sedemussada. Cun glied e tiers han ei gidau ils donnegiai, surtut de baghegiar ed aunc oz vegn ei gidau gratuitamein sch'enzatgi ha de far clavau. Negin ha muentau in det per sustener finanziamein ils de Schlans. Paucs francs seigian vegni termess tier. Mai ei ina vischnaunca pintga vegnida tuccada aschi grevamein entras boas, e Dieus vegli pertgìrar nus e tuts da semegliantas disgrazias. Senza far bia donn ei ina gronda part dil grep de Surbual vegnius giu ils 8 de december 1917. Igl avrel 1922 ein circa 50 meters cubics sedestaccai dil grep della resgia e sederschi. Mo miraculusamein ei quella massa sefermada sper la casa, che havess tgunschamein saviu vegnir smardigliada cun tut ils cusadents. La stermentusa malaura che ha tuccau e devestau ina part della Surselva ils 25. de settember 1927 ha era schau anavos a Schlans ses fastitgs. Tut ils umens e buobs fuvan en tutta dracca ftschentaì cun empalar dapertut endretg las auas, fertont che las femnas fagievan cun il plevon oraziun en baselgia, sinaquei che Niessegner pertgìri d'ina sventira, sco Zignau vegneva avon nos églis tuccaus, senza haver la pusseivladad de saver gidar. Pìgns sbuaus ha ei dau sin tut igl intschess. Ad Acla ei ina gronda e profunda val seformada el fundament ded in baghetg. A Tuella ei remarcablamein quasi gl'entir terren ded in frust vegnius alzaus orasi en fuorma de priel e seruschnaus giu el Rein. Ina reha collecta en l'entira Svizzera ha era gidau nos donnegiai.

Quei ei ina tresta cronica. Las cruschs e tribulaziuns audan tier la veta humana e communal. Il singul burgheis e surtut las suprastonzas han l'obilgaziun de tener en égl ils elements, che perecliteschan la facultad privata e communal, oravontut

las auas, greppas e lavinas. Nos babuns fuvan pli precauts e schanegiavan da sesez anora ils uauls en la vischinonza dil vitg meglier, che quei ch'ins fa ussa malgrad las leschas.

Era en il regenavel della flora e della fauna san ins constatar, che pliras famiglias ein mortas ora. Ei fuss in fetg interessant studi, de perseguitar quei combat en la natira sin nies intschess.

## VI. Ovras constructivas.

Il spért dil carstgaun lavura adina e sunter disgrazias e sfortunas cun dubla energia. Il temps de Tello ed il XX secul ein bein differents. Negin signur, che rimbursa las dieschmas e negin migiur, che fa per el lavurs servilas; tuts purs, tuts tutina. La libertad personala ei carschida, e la vischnaunca ha entamaun dretgs, che udevan als conts. Varga melli onns han quels fretgs duvrau de semadirar, mo en relaziuns pintgas sco Schlans ei quei resultat ideals.

Alps, pastiras, uauls ed auas ein della vischnaunca e tuts vischins san far diever, tochen tier l'uiara mo per ina pintga taglia. Cheutier vegn il dretg dil bual — pasculaziun cummina — ch'ei per tuts ina sligiazion practica — in communismus senza sgarschur. In pulit mulin ha la vischnaunca construïu enstagl ded in diember mulins bass e faluns privats, che stavan sper igl ual. La resgia ei medemamein proprietad della vischnaunca ed ina societad ha ina senneria. Dapi la construcziun dils hidrants 1892 han era tut las parts dil vitg sufficientamein aua frestga.

Il singul sa era dir: „Quei ei miu prau, quei miu clavau, quei mes affons, miu agen saung“, e quei sentiment d'indendenza stimulescha de luvrar e spargniar. Quei spért han tuts ils de Schlans adina demussau, e la vischnaunca ha tochen ils davos onns, nua ch'in spért impurtau ha turbelau, mai giu de sustener munglus. La prosperitad se demuossa en il grond diember stupentas casas lenn, ch'ein vegnidas construidas en il davos tschentaner. 1916 ei la vischnaunca stada en la necessitad de baghegiar ina casa de scola per circa 50000 francs. Concernent las vias ei Schlans staus tschentaners ora sin il medem schliet scalem.<sup>1</sup>

<sup>1</sup> Entochen 1858 cun l'avertura della via nova Rehanau-Mustér mava il pot 2 gadas ad jamna giu Tiraun. La via de carr per menar si ils butschins sal — quasi il sulet artechel che stueva vegnir impurtaus — mava da Tiraun, Fanels, Plauns e Palius.

Suenter liungas deliberaziuns ed in recuors tier il Cussegl Grond pervia dil manteniment ei la via nova Schlans-Trun finalmein 1920 vegnida baghegiada. Cun megliurar las vias dellas aclas savess la producziun vegnir augmentada e la lavur levgiada considerablamein.

Ils buns avdents han adina distinguu exact denter miu e tiu. Per levgiar quei han ils babuns menau en las nodas casa. Mintga famiglia sto haver ina, e quella arta il fegl giuven. La famiglia Vincenz ha sco motiv il quadrat e las differentas modulaziuns de quel.



La famiglia Pfister va ora dil calisch e fa bia variaziuns de quel.



Cun quellas enzenas vegn igl inventari moveivel, sco utensils, lenna e resti nudai, fertont ch'ils tiers survegnian tagls en las ureglias. La vischnaunca ha ina crusch X, e tiers manedels ston vegnir barschai sin la missialla dretga.

Bein enqual vegl usit ei stulius. Las masiras e las spatlunzas enconuschein nus mo ord la litteratura e fuvan muments essenzials en la veta de nos babuns. Il better schibas ei 1885 vegnius scumandaus pervia dil prighel de fiug. Il grep ei restaus e las mattauns dattan aunc adina bugen patlaunas e groma l'emprema dumengia de cureisma. Che il magun ei visavi savurusas spisas conservativs, muossa era igl usit de nozzas. La compagnia de mats lai sittar murtés e dat cheutras in character pli solemn alla fiasta. Duront il gentar compara ina delegaziun de treis giuvens e plonscha, ch'il spus hagi priu la pli biala flur ord il curtgin ch'ils mats han de survigilar. Persuenter garegian ei ina indemnisaziun. Il meinaspusa defenda ils dretgs dil spus, che vegn constrenschius de pagar ina summa alla compagnia de mats.

Vegn in niev vischin sil mund sche annunziescha il zenn s. Gieri il baten d'in buob ed il zenn pign quel d'ina buoba. Da miert vegn per tuts il zenn s. Gieri tuccaus en 3 gadas duront ina ura. Treis notgs vegn ei vegliau sper la bara recitond il rosari. Baras de personas buca maridadas portan 4 mats e schiglioc sche pusseivel 4 figliols. Fidonza sin Niessegner ha il pur. Per regla vegn l'alp benedida il di della cargada, persuenter retila il plevon dua stera piaun — 12 kilos. Per implorat

benedicziun sur funs e muvels vegn il zenn s. Gieri tuccaus da miezdi naven della fiasta de s. Gieri entochen la dumengia dil rosari. Detti Dieus, ch'il bien spért che ha victorisau sur tuttas disgrazias e tribulaziuns regi, e lu savein nus dir cul poet: „La forza, convischins, schai en nies cor fidau.“

## MIU VITGET.

(Dr. Alex. Pfister, Basel)

---

1. Al pei dil cuolm schais, miu vitget,  
La stgira notg vev' tei curclau  
Mo ussa ei il di levas  
E mira sil vitget.
  2. Il bi suleagl vegn a riend  
Dal péz tier miu deletg,  
Sclaresch' als buns aschi bugen  
Al car e bien vitget.
  3. Sur casas brinas e vus tetgs  
Schi bialas sut 'gl azur  
Con losch sesaulza sco pastur  
Il tempel el vitget.
  4. Ed el pertgira tard e baul  
Ils habitonts giu da siu ault,  
El rimna els en devoziun  
Ils cars en miu vitget.
  5. Fagies la sort da mei in retg,  
Beaus e leds en in casti,  
Stuess el star en tiu rudi,  
Miu car e bi vitget.
-